

ofzeschaffen an d'Guthaben, wat nach am Fong ass, zeréck op d'Gemengen ze verdeelen.

Här President, léif alleguer, ech wéilt nach kuerz op déi verschidden Avisen ze schwätze kommen. Et waren der véier am Ganzen a si hunn alleguer hir vollsten Zoustëmmung ginn. Et waren dës déi vun der Chambre des Métiers, der Chambre de Commerce, dem Syvicol an dem Staatsrot.

Ofschléissend wëll ech Iech nëmmen nach prezieséieren, dass dëst Gesetz et de Gemengen erlaabt, a vollster kommunaler Autonomie d'Suen, déi se zeréckkréien, och do anzesetzen, wou se gebraucht ginn. Ech woen emol ze behaapten, dass sämtlech Gemegepolitiker a -politikerinne sech natierlech iwwert dës Finanzspréitz freeën.

Ech soen Iech Merci.

Plusieurs voix | Très bien!

M. Claude Wiseler, Président | Merci, Madamm Morgenthaler, fir Äre schrëftlechen a fir Äre mëndleche Rapport.

Dann ass d'Wuert fir d'Regierung, wa se wëllt.

Prise de position du Gouvernement

M. Léon Gloden, Ministre des Affaires intérieures | Merci, Här President. Ech soe Merci fir de Rapport an och déi gutt Zesummenaarbecht bei dësem Projet. An ech si frou, wann ech déi Suen da ka liquidéiere fir d'Gemengen.

M. Claude Wiseler, Président | Merci, Här Minister.

Elo komme mer zur Ofstëmmung iwwert de Projet de loi 8408. Den Text steet am Document parlementaire 8408^s.

Vote sur l'ensemble du projet de loi 8408 et dispense du second vote constitutionnel

D'Ofstëmmen fänkt elo un. De Quorum ass erreecht. Vote par procuration. E klengen Effort nach. Da schléissen ech de Vott of.

D'Resultat vum Vott ass: 59 Jo-Stëmmen, keng Nee-Stëmm, keng Abstentioun. Dëse Projet de loi ass also mat 59 Jo-Stëmmen bei kenger Nee-Stëmm a kenger Abstentioun ugehol.

Ont voté oui : Mmes Diane Adehm, Nancy Arendt épouse Kemp (par M. Laurent Mosar), MM. Maurice Bauer, Jeff Boonen (par M. Jean-Paul Schaaf), Alex Donnersbach (par M. Marc Lies), Emile Eicher (par Mme Nathalie Morgenthaler), Félix Eischen, Paul Galles, Mme Françoise Kemp (par M. Maurice Bauer), MM. Marc Lies, Ricardo Marques (par Mme Octavie Modert), Mmes Octavie Modert, Nathalie Morgenthaler, MM. Laurent Mosar, Jean-Paul Schaaf, Marc Spautz, Charles Weiler, Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen (par M. Gusty Graas), MM. Luc Emering, Fernand Etgen, Patrick Goldschmidt, Gusty Graas, Mmes Carole Hartmann, Mandy Minella (par M. André Bauler) et M. Gérard Schockmel (par M. Guy Arendt) ;

M. Dan Biancalana, Mmes Taina Bofferding, Liz Braz, Francine Cloener, M. Yves Cruchten, Mme Claire Delcourt, MM. Mars Di Bartolomeo (par M. Georges Engel), Georges Engel, Franz Fayot (par M. Ben Polidori), Claude Haagen (par M. Yves Cruchten), Mme Paulette Lenert et M. Ben Polidori ;

MM. Jeff Engelen, Dan Hardy (par Mme Alexandra Schoos), Fred Keup, Mme Alexandra Schoos et M. Tom Weidig ;

Mme Djuna Bernard, M. Meris Sehic (par Mme Djuna Bernard), Mmes Sam Tanson et Joëlle Welfring ;

MM. Sven Clement (par M. Marc Goergen) et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Dann ass dat esou decidéiert.

5. 8409 – Projet de loi modifiant la loi modifiée du 30 juin 1976 portant

1. création d'un fonds de chômage ;

2. réglementation de l'octroi des indemnités de chômage complet

An da komme mer zum leschte Punkt vun dëser Sëtzungswoch, an zwar dem Projet de loi 8409, enger Upassung vum System vun de Gemegebäiträg zum Fonds pour l'emploi. D'Riedezäit ass nom Basismodell festgeluecht. Deen ass nach ëmmer de selwechte wéi bei deenen zwee éischten Texter. An et hu sech schon ageschriwwen: d'Madamm Nathalie Morgenthaler, den Här Luc Emering, den Här Dan Biancalana, den Här Tom Weidig, d'Madamm Sam Tanson an den Här Marc Baum. An d'Wuert huet elo d'Rapportrice vum Projet de loi, déi honorabel Madamm Nathalie Morgenthaler. Madamm Morgenthaler, Dir hutt d'Wuert.

Rapport de la Commission des Affaires intérieures

Mme Nathalie Morgenthaler (CSV), rapportrice | Här President, léif alleguer, d'Haaptzil vun dësem Gesetzesentwurf, deen den Inneminister den 3. Juli 2024 hannerluecht huet, ass et, de System vun de Gemegebäiträg an de Fonds pour l'emploi, de Beschäftigungsfong, ze reforméieren an domat méi gerecht fir d'Gemengen ze maachen.

Am Kader vun der Gemegefinanzreform, dat ass d'Gesetz vum 14. Dezember 2016, déi zur Schafung vum FDGC, de Fonds de dotation globale des communes, gefouert huet, gouf decidéiert, dass d'Gemengen 2 % vun hiren Einnahmen aus der kommunaler Gewerbesteier, dem ICC, dem Impôt commercial communal, an de Beschäftigungsfong missten abezuelen.

D'Verdeelung tëschent de Gemeinde gouf mat zwee getrennte Bäiträg gemaach, wat awer zu Ongläichheete gefouert huet. Sou hunn zënter 2021 manner wéi een Drëttel vun de Gemengen an de Fong abezuelen. Ausserdeem war fir eng Majoritéit vun dëse Gemengen hire Bäiträg an de Beschäftigungsfong méi héich wéi hir direkt Bedeelegung um Ertrag vun der kommunaler Gewerbesteier.

Dëse Gesetzesentwurf soll also elo dës Ongläichheet erëm ofbauen, andeems e méi gerechte Bäitragsystem agefouert gëtt, deen op neien a vereinfachte Methode berout. D'Berechnung vun de Gemegebäiträg baséiert sech elo op den direkte Bäiträg vun all de Gemengen um Ertrag vun der Gewerbesteier, déi op hirem Territoire generéiert gëtt, verglach mam Gesamtbäiträg vu sämtlechen Gemengen. Sou dréit an Zukunft all Gemeng a Fonctioun zu hirer finanzieller Capacitéit bäi.

All Gemeng bezilt hire relativen Undeel vun den 2 % vum Gesamtbetrag vun der kommunaler Gewerbesteier, wat méi transparent a gerecht ass an och de Prinzip vun der Solidaritéit tëschent de Gemeinde respektéiert, well souwuel d'Verfassungsgericht wéi och d'Verwaltungsgericht fannen, dass dësen aktuelle System eeben dësem Solidaritéitsprinzip net gerecht gëtt.

Här President, léif alleguer, ech wéilt nach gäre chronologesch op déi verschidden Avisen agoen, déi erakomm sinn.

De Syvicol huet dëse Gesetzesentwurf den 30. September d'lescht Joer majoritär begréisst a gläichzäitig drop opmierksam gemaach, dass déi finanziell Belaaschtung fir déi meescht Gemeinde géifen zouhuelen an dës Bäiträg och laangfristeg misse sécher gestallt an ageplangt ginn.

D'Chambre de Commerce huet hir Zoustëmmung den 11. Dezember d'lescht Joer ginn.

Déi héich Kierperschaft huet an hirem Avis vum 21. Januar vun dësem Joer e puer legistesche Verbesserungsverschléi gemaach, awer och eng formell Opposition. Sou huet de Staatsrot et juristesche onsécher fonnt, d'Gesetz retroaktiv ze applizéieren.

A senger Dépêche vum 31. Mäerz (veuillez lire: 28. Mäerz) vun dësem Joer konnt den Innenminister dem Staatsrot awer plausibel erklären, wéi hie sämtlech Konditiounen vun der Retroaktivitéit erfëllt huet. Dat apart, andeems hie souwuel de Syvicol wéi all d'Gemengen offiziell a matzäiten informéiert huet, sou dass déi héich Kierperschaft an hirem zousätzlechen Avis vum 4. Abrëll hire Widerstand opgehuewen huet.

Här President, erlaabt mer, elo meng Kap als Rapportrice ofzeleeën an am Numm vun der CSV-Fraktioun ze schwätzen.

Discussion générale

Wéi virdru scho gesot, huet den aktuelle Berechnungsmodus vum Beschäftigungsfong zu Ongläichheeten tëschent de Gemeinde gefouert. Zënter 2021 hu manner wéi een Drëttel vun de Gemengen an de Beschäftigungsfong abezuelen. 2021 waren et 31 Gemengen, 2022 nach 28 Gemengen an 2023 nëmmen nach 27 Gemengen.

Am Joer 2023 schwätze mer also vum engem Gesamtbetrag vu 25,43 Milliounen, deen an de Beschäftigungsfong abezuelen ginn ass, deen awer nëmme vu 27 Gemeinde gestëmmt ginn ass.

Wat nach derbäikënn, dat ass, dass de Betrag vu méi wéi der Hallschent vun de Gemengen, déi abezuelen hunn, méi héich ass wéi hir Direktbedeelegung um Ertrag vun der kommunaler Gewerbesteier.

Hei nëmmen zwee Beispiller, fir dës Diskrepanz ze illustréieren: De Betrag vun der Gemeng Wëntger louch 2023 bei 3 Milliounen, während hiert Akommes aus der direkter Participatioun um Erléis vum ICC sech nëmmen op 1,7 Milliounen belaf huet.

D'Gemeng Wäiswampech dréit 2,1 Milliounen zum Fong bäi, kritt awer nëmmen 1,6 Milliounen aus der direkter Participatioun vum ICC eraus. Heibäi däreer een net vergiessen, dass all déi aner Gemeinde guer näischt abezuelen hunn.

Dëse Gesetzesentwurf soll dann elo dës Ongläichheeten op Basis vum Solidaritéitsprinzip tëschent de Gemeinde reduzéieren an de Berechnungssystem méi transparent, awer virun allem och méi gerecht maachen.

Mir begrëssen als CSV dës méi grouss Equitéit tëschent de Gemengen, wou all Gemeng sech um Beschäftigungsfong bedeelegt, an net déi eng vill an anerer guer net. Den neie System garantéiert, dass all Gemeng no hirer finanzieller Capacitéit zum Beschäftigungsfong bäidréit.

Als CSV begrësse mer dann natierlech och, dass den Inneminister dësen Entwurf an enker Zesummenaarbecht mam Syvicol ausgeschafft huet.

Aus all dëse Grënn ginn ech dann och d'Zoustëmmung vun der CSV-Fraktioun a soe Merci fir d'Noleschteren.

Plusieurs voix | Très bien!

M. Claude Wiseler, Président | Ech soen der Madamm Morgenthaler villmools Merci fir hire schreftlechen a fir hire mündleche Rapport. Den éischten ageschriwwene Riedner ass den Här Luc Emering. Här Emering.

M. Luc Emering (DP) | Här President, léif Kolleeginnen a Kolleegen, mat dësem Projet gëtt de System vun de Gemengecontributiounen fir de Fonds pour l'emploi reforméiert. Et ass scho vun der Madamm Morgenthaler gesot ginn: Et sinn e puer Inegalitéiten festgestallt ginn, déi mat dësem Projet adaptéiert ginn. An dat ass ausdrécklech ze begrëssen. Verschidde Gemenge bezuele méi a wéi dat, wat se zréckkréien, hu mer héieren. An effektiv manner wéi een Drëttel vun de Gemenge contribuëiert aktuell iwwerhaapt an de Fong.

Ab elo sollen d'Gemenge just hirer reeller Capacitéit no abezuelen, an dat am Sënn vu méi Solidaritéit a Gerechtegkeet zwëschen de Gemengen. Dësen neie System wäert et erlaben, déi finanziell manner staark Gemenge vun héijen an disproportionelle Contributiounen ze verschounen.

Als DP si mir selbstverständlech mat dësem Projet averstanen, an ech ginn dofir heimat den Accord vu menger Fraktioun.

Plusieurs voix | Très bien!

M. Claude Wiseler, Président | Merci, Här Emering. Dann ass d'Wuert fir den Här Dan Biancalana. Här Biancalana.

M. Dan Biancalana (LSAP) | Merci, Här President. Léif Kolleeginnen a Kolleegen, jo, de Gesetzesprojet, dee mer haut stëmmen, dréit zu enger Reform vun der Reform vum Fonds pour l'emploi bäi, deem 2016 am Gesamtpackage vun der Reform vun de Gemegefinanzen an d'Weeër geleet gouf. An heibanne si jo eng Partie Deputéiert, déi och um lokalen Niveau aktiv sinn an dowéinst natierlech dann och, ënner anerem, direkt vun der Reform a vun där neier Contributiounsbäitragformule betraff sinn.

Ech mengen, pour rappel – et ass nach net ernimmt ginn –: De Fonds pour l'emploi gëtt jo virun allem vum Aarbechtsministère verwalt. An op dee gëtt jo effektiv zréckgegraff, zum Beispill am Kader vu Fäll, wann Indemnisiounen och nach solle stattfannen um Niveau vum Personal. An dëse Fong gëtt säit der Gemegefinanzreform vum Joer 2016 – mir hunn et héieren – vun e puer Gemengen op Basis vun enger méi komplexer mathematescher Formel gespeist.

Dës baséiert zu engem Deel um Solidaritéitsprinzip, datt déi Gemengen, deenen hir Recetten iwwer e gewëssene Prozentsaz vun der Moyenne vun de kombinierten nationale Recettë par population ajustée vum Impôt commercial ginn, aner Gemengen, bei deenen dës net de Fall ass, am Fong matkompenséieren. An anere Wieder – an ech mengen, dat war jo e bëssen d'Steckepäerd vun der Finanzreform bei de Gemengen –: Déi Gemengen, déi méi substanzuell Recettë par habitant ajusté kréien, solle méi an dëse Fong abezuelen – och wann d'Reform vun 2016 am Fong déi Diskrepanzen, wat déi Pro-Kapp-Dotatioun ugeet, jo effektiv deementspreechend méi kleng gemaach huet. An ech mengen, mam Vott vun dësem Gesetz fällt dës Logik natierlech deementspreechend ewech.

D'Gemengen, déi abezuelen – Stand 2023, dat konnte mer hei effektiv liesen –, dat sinn der 27 Stéck. An d'Bestëmmung, effektiv, ass nom aktuelle System individuell, fir kollektiv kënnen ze entlaaschten, well déi betraffe Gemenge contribuëiere jo zesummen en

totale Montant vun 2 % vum Impôt commercial um nationale Plang.

Esou entlaaschte si d'Gemengen, deenen et finanziell am Fong net esou gutt geet. An do deelen ech effektiv d'Aschätzung vum Här Emering net. Ech mengen, mir sinn hei am Kader vun enger Solidaritéit, déi ze spillen huet. A mir stinn och als LSAP fir déi Solidaritéit. Mir gesinn am Fong awer de Wee dohinner ganz kloer anescht.

Et kann een natierlech higoen – an, ech mengen, dat ass jo och hei e puermol ernimmt ginn, an dat ass jo och bei dësem Gesetz de Fall – a soen, dat wier natierlech net solidaresch, dat Gesetz, dat bis elo appliquéiert gouf. Mee den aktuelle System baséiert awer op deem Gedanken, wéi gesot, dass déi méi staark Gemengen iwwert d'Pro-Kapp-Dotatioun, déi se hunn, déi aner och deementspreechend mathuelen. Och dat ass e Wee vun der Solidaritéit. Mee d'Interpretatioun dovunner an de Wee dovunner ass deementspreechend an anere wéi deen, deen 2016 gaange ginn ass, par rapport zu deem, deen et elo deementspreechend gëtt.

An hannert där Logik vun 2016 sti mer och ganz kloer als LSAP, well, mengen ech, iwwert deen heite Wee och déi aner Gemengen domat effektiv profitéiert hunn, wann effektiv méi staarkgestallte Gemengen, déi awer laut der Landesplanung effektiv och emol eng Rei Attributiounen haten, déi aner och matgehooll hunn.

Mat dëser Reform vun haut droen natierlech all d'Gemengen elo direkt zu der Speisung vum Fonds pour l'emploi bäi. An hir finanziell Capacitéit gëtt do gekuckt. An natierlech dréit och déi ekonomesch Fluktuatioun deementspreechend mat. Mee am Fong si mer elo effektiv an der Logik, dass de System vun enger Pro-Kapp-Dotatioun op e System eriwuergeet, wou am Fong jiddweree contribuëiert. An effektiv, mengen ech, ass dat eng aner Approche.

An et kann een och gesinn – virdru sinn hei Zuele genannt ginn –, dass den aktuelle Mechanismus, deen och op zwee Niveaue gespilt huet, deen elo am Fong hei reforméiert gëtt, et natierlech dozou bruecht huet, dass verschidde Gemengen agespeist hunn an anerer net – well och eng aner Logik vorhande war.

Mee dat heescht zum Beispill – an ech wëll se hei awer opzielen, well mer et och am Projet de loi hei kloer hunn –, dass eng Stad Esch an Zukunft dann och 780.000 Euro wäert dozou contribuëieren, mee wou mer awer wëssen, dass och duerch d'Gemegefinanzreform hir Pro-Kapp-Dotatioun insgesamt effektiv net an der Hitparad ass. Suessem: 398.000. Beetebuerg: 410.000. Mamer: 600.000. Hesper: 813.000. Kärjeng: 272.000. Ettelbréck: 110.000. Iechternach: 175.000. Diddeleng: 190.000. Schëffleng: 210.000. Dat sinn déi Gemengen, déi elo méi abezuelen. A mir hunn natierlech och Gemenge wéi Leideleng, déi bezuelen 1,4 Milliounen manner; Nidderaanwen: 1,7 Milliounen manner; Contern: 1,4 Milliounen manner; Clief: 1,5 Milliounen manner.

A mir wëssen natierlech och: D'Gemenge Leideleng an Nidderaanwen hate jo um Tribunal administratif respektiv herno op der Cour administrative heigéint geklot – ënner anerem. Si sinn och generell géint de Modus vum Impôt commercial virgaangen an hunn hei net Recht kritt. An effektiv huet d'Cour administrative gesot, mengen ech: „De Mechanismus ass hei en place, a wann een deen ännere muss, da muss een dat natierlech iwwert d'Gesetz maachen.“ Dat gëtt jo dann hei gemaach. Also ass och dës Ännerung e resolut politesche Choix.

Wéi gesot, als LSAP sti mer hannert der Solidaritéit tëscht de Gemengen. Mee de Wee, fir deen effektiv

ze goen, wär fir eis en aneren. Héich Recettë pro Kapp heescht am Fong geholl elo net méi, datt ee méi contribuëiere muss – au contraire. Mir kommen also an eng komplett nei Logik.

Et konnt een natierlech feststellen, dass verschidde Gemenge méi contribuëiert hu wéi dat, wat se vun Impôt commercial haten. Mee och hei hätt ee sécherlech effektiv kënnen en anere Modus eraussichen, notamment am Kader, zum Beispill, vun enger Brems, wann een esou Situatiounen gesäit. Mee natierlech hätt ee sech och misse méi Aarbecht maache ronderëm dee ganze Calcul vun der Contributioun! Sou wéi dat och 2016 deementspreechend gemaach gouf. Haut gëtt gesot, dass jiddereen effektiv muss 2 % vum ICC contribuëieren.

Also, wéi gesot, mir wäerten eis bei dësem Projet als LSAP enthalten.

Merci.

Plusieurs voix | Très bien!

M. Claude Wiseler, Président | Merci, Här Biancalana. Dann huet den Här Tom Weidig d'Wuert. Här Weidig.

M. Tom Weidig (ADR) | Jo, mir begrëssen, datt dës Reform kënn, well se Ongerechtegkeeten an aktuelle Gesetz rectifiéiert. Et ass wichteg fir d'Fairness, datt all d'Gemenge jee no hirem Steuerakommes bäisteieren. Et kann een natierlech trotzdeem d'Fro stellen, firwat datt déi lescht Regierung dat net am éischte Worf gemaach huet. Duerfir wäerte mir dës Gesetz matstëmmen.

Une voix | Très bien!

M. Claude Wiseler, Président | Merci, Här Weidig. Madamm Tanson.

Mme Sam Tanson (déi gréng) | Jo, merci, Här President. Ech limitéiere mech drop, den Accord ze gi vun deene Gréngen no den ausféierlechen Erklärungen vun der Rapportrice.

Merci.

M. Claude Wiseler, Président | Merci, Madamm Tanson. Den Här Marc Baum.

M. Marc Baum (déi Lénk) | Merci, Här President. Ech verstinn déi Explikatioun vum Här Biancalana, mengen awer, datt deen heiten Text een ass, dee bestoend Inegalitéiten aus dem Wee raumt. An et misst ee sech effektiv d'Fro stellen, wat d'Contributiounsfäegkeet generell vun de Gemengen an de Fonds pour l'emploi ugeet. Do, mengen ech, géifen et och nach Piste ginn, wéi ee vläicht och nach interkommunal aner Gerechtegkeetsmechanisme kéint aféieren, sou datt déi, déi wierklech ganz vill hunn, och kënnen zu deem Deel participéieren, wéi dat, mengen ech, richteg wier.

Ech mengen awer, datt dat heiten zumindest eng bestoend Ongerechtegkeet aus dem Wee raumt, an duerfir stëmme mer dat heite mat.

M. Claude Wiseler, Président | Merci, Här Baum. Dann huet d'Regierung ...

(Interruption par M. Michel Wolter)

Den Här Wolter freet nach d'Wuert. Här Wolter.

M. Michel Wolter (CSV) | Här President, ech muss soen, dass d'Contributioun vum Kolleeg vun der LSAP mech natierlech dozou bréngt, e puer Saachen ze soen.

Une voix | A!

M. Michel Wolter (CSV) | Well alles, wat elo hei esou am gudden Einverständnis komm ass, dat war 2016 eng Risendiskussioun! Déi Aart a Weis, wéi den LSAP-géféierte Ministère déi Reform gemaach huet – déi fir

mech schonn deemools eng ongerecht Reform war a bleift an dat och bis elo bewisen huet –, dat war ganz staark contestéiert.

Dat, wat elo hei gemaach gëtt ... A meng Gemeng gehéiert dann zu deenen, déi méi mussen bezuelen, well eeben de Modus geännert gëtt. Elo kann een iwwer all Modus diskutéieren. Deen heiten ass net méi an net manner schlecht. En ass, menger Meenung no, souguer besser, méi gerecht am Verglach zu de Gemenge wéi deen, deen deemools gemaach ginn ass.

Also dofir sinn ech, contrairement zu Iech, ganz frou, dass dat elo aneschtens geschitt. Mee et ass awer nëmmen en Deel vun deem, wat den Här Kersch eis deemools hei imposéiert huet a wat mat de Stëmme vun der deemoleger Majoritéit gestëmmt ginn ass.

Deen zweeten Deel, dat ass déi gepoolte Contribution vun de Gemengen un d'Pensiounskeess, déi och 2016 agefouert ginn ass, a wou ech de Minister wollt froen – vu dass dat hei een Deel ass vun där Reform –, ob en och amgaangen ass, dorunner ze schaffen, deen Deel vun der Reform och zréckzemaachen.

Ech erënneren drun, dass mir haut an engem System liewen, an deem d'Gemengen, déi net vill Leit hunn an déi probéieren, hir Aarbecht ordentlich ze maachen, mat därer contribuieren un de Pensiounscotisations vum deene Gemengen, déi ganz vill Leit hunn.

An ech kann eigentlech net novollzéien, bis haut, dass ee muss contribuieren fir Leit, déi net bei engem selwer schaffen. Och eng Gemeng ass Patron. A wann een als Gemeng Patron ass, da soll ee contribuieren fir déi Leit, déi bei engem schaffen. An et soll een net mussen contribuieren fir déi Leit, déi net bei engem schaffen.

An ech si ganz gespaant op dem Minister seng Ausféierungen dozou, well dat fir mech eigentlech en zweet Standbeen ass, wat dringendst reforméiert muss ginn, nodeem – dat wëll ech awer och soen – meritoirement am leschte Joer déi CGDIS-Ongerechtegheet tëschent dem Staat an de Gemengen aus dem Wee geschaf ginn ass a mer do tëschent de Gemengen an dem Staat elo op engem Wee sinn, wou jiddwereen dat bezilt, wat en eigentlech vun Ufank un hätt solle bezuelen.

Merci.

Plusieurs voix | Très bien!

M. Claude Wiseler, Président | Merci, Här Wolter. Elo gesinn ech awer keng Wuertmeldunge méi.

Da ginn ech der Regierung d'Wuert. Här Inneminister.

Prise de position du Gouvernement

M. Léon Gloden, Ministre des Affaires intérieures | Merci, Här President. Och merci fir déi Contributionen. Ech mengen, et geet hei ëm de Fonds pour l'emploi, wou à la base d'Iddi vun der Solidaritéit ass. Dat ass e puermol hei ugeschwat ginn, ech kommen do elo net méi drop zréck.

Duerfir ass et och fir mech wichteg, dass de Finanzement vun deem Fonds pour l'emploi op enger Solidaritéitsbasis gräift. Déi war bis elo menger Meenung no net an deem Mooss do, well – et ass schonn e puermol gesot ginn – nëmme knapp en Drëttel vun de Gemengen dozou bäigedroen huet. A besonnesch kleng Gemengen, och aus dem ländleche Raum, hunn am Fong méi do bezuelt, wéi se iwwert den ICC erakritt hunn. Déi sozial Ongerechtegheet gëtt elo opgehewee mat dëser neier Method fir ze rechnen fir d'Contributionen.

Ech huelen elo, duerch Zoufall, d'Gemeng Diddeleng dann eng Kéier. D'Gemeng Diddeleng huet säin ...

M. Dan Biancalana (LSAP) | Ganz duerch Zoufall!

(Hilarité et interruptions)

M. Léon Gloden, Ministre des Affaires intérieures | D'Gemeng Diddeleng huet ni eppes an de Fonds pour l'emploi abezuelt. D'Participation directe bei dem ICC: 2021: 2,362 Milliounen; 2022: 2,114 Milliounen; 2023: 1,5 Milliounen; 2024: 2,63 Milliounen.

Wann ech elo kucken, wat Der kritt iwwert den FDGC: Do gi mer vu 70 Milliounen 2021 op 95 Milliounen 2024.

(Interruptions)

An Dir bezuelt elo 2024: 66.000 Euro. Ech mengen, ganz éierlech gesot, Här Biancalana: Eng Gemeng Diddeleng misst dat packen, well soss maachen ech mer wierklech Suergen. Mee ech weess, déi Gemeng ass jo gutt gefouert.

Plusieurs voix | O! A!

(Hilarité)

M. Léon Gloden, Ministre des Affaires intérieures | Duerfir kann ech mer virstellen, dass Der déi 66.000 Euro locker aus der Portokeess kënnt bezuelen. D'autant plus, dass den Inneminister d'lescht Joer zsumme mam Finanzminister zum Schluss nach eng Kéier 15 % an der Moyenne méi ausbezuelen huet, wéi dat geplangt war.

Mee, wéi gesot, dat heiten ass ee wichtige Schrëtt vun der Reform fir d'Gemengefinanzen.

En zweete Schrëtt ass d'Subsidepolitik. An duerno kommen ech op Är Fro, Här Wolter.

D'Subsidepolitik ass jo och haut gekoppelt un d'Capacité financière vun enger Gemeng. An ech sinn der Meenung, politesch: E Bierger ass e Bierger an e Kand ass e Kand – egal wou e wunnt. Well och ganz oft d'Leit sech net kënne fräiwëleg eraussichen, wou ee wunne geet, wou ee schaffen geet.

An duerfir, an Zukunft ass et: E Kand ass e Kand, an en Awunner ass en Awunner. An do kritt dann eng Gemeng och hir ... Wa se eng Maartplaz wëll frëschaachen, eng Gemeng wëll bauen, da gëtt net no der Capacité financière gekuckt, mee et gëtt gekuckt no engem Schlüssel, dee mer amgaange si festzeleeën. Mir wäerten och do d'Plaffongen eropsetzen, besonnesch bei de Schoulen.

Ech sinn do och amgaangen, mam Educationsminister ze kucken, dass mer méi subsidiéiere wéi just de Schoulsall, zum Beispill, wéi dat haut de Fall ass. Mir kënnen och an Zukunft kucken, well mer politesch der Meenung sinn, dass d'Resilienz och e wichtige Facteur ass an den Infrastrukturen, dass een esou baut, wann eng Naturkatastroph geschitt – Iwwerschwemmungen –, dass een dat muss bei der Planung mat a Consideration huelen. Dee System heescht „Build Back Better“. Wann een dann no deem System baut, kann een och nach zousätzlech Subside kréien. A wann déi Infrastrukturen, ... wann een zum Beispill – an dat kann ee bei den däitsche Kollege kucken, do gëtt haut schonn am Iwwerschwemmungsgebiit esou gebaut –, wann eng Gemeng zum Beispill eng Sportsal baut, da gëtt se esou gebaut, dass se och ka fir de Katastropheschutz, zum Beispill, genotzt ginn, wann et zur Naturkatastroph kënnt. Dat sinn alles Punkten, déi mer och wëllen an eis Subsidepolitik an Zukunft abauen.

Dann zu de Pensiounen. Do kann ech Iech soen: De Grupp, dee sech mat där Reform soll beschäftegen,

ass jo composéiert. Mir kréien elo Zuelen – well ech och emol eng Kéier d'Zuelen all am Detail wëll presentéiert kréien – virum 15. Juli presentéiert.

Duerch déi geplangte Pensiounsreform hat deen Organismus elo e bessen aner Aufgaben ze dinn, wéi sech mat deenen Zuelen ze beschäftegen. Dat kréie mer elo. An da wäert ech zsumme mam Syvicol a mat de Gemenge kucken, dass mer do, éischts, dat weider finanziert kréien an och do e System fannen, dee méi gerecht a méi solidaresch ass.

Merci.

Plusieurs voix | Très bien!

M. Claude Wiseler, Président | Merci, Här Minister.

Domat wär dann d'Diskussion zu dësem Projet de loi ofgeschloss a mir géngen zur Ofstëmmung iwwert de Projet de loi 8409 kommen. Den Text steet am Document parlementaire 8409⁶.

Vote sur l'ensemble du projet de loi 8409 et dispense du second vote constitutionnel

D'Ofstëmmen fänkt elo un. De Quorum ass erreicht. Vote par procuration. De Vott ass ofgeschloss.

D'Resultat vum Vott ass: 48 Jo-Stëmmen, keng Nee-Stëmm an 12 Abstentionen. Dëse Projet de loi ass also ugeholl mat 48 Jo-Stëmmen bei 12 Abstentionen.

Ont voté oui : Mmes Diane Adehm, Nancy Arendt épouse Kemp (par M. Laurent Mosar), MM. Maurice Bauer, Jeff Boonen (par Mme Diane Adehm), Alex Donnersbach (par M. Félix Eischen), Emile Eicher (par Mme Nathalie Morgenthaler), Félix Eischen, Paul Galles, Mme Françoise Kemp (par M. Maurice Bauer), MM. Marc Lies, Ricardo Marques (par Mme Stéphanie Weydert), Mmes Octavie Modert, Nathalie Morgenthaler, MM. Laurent Mosar, Jean-Paul Schaad, Marc Spautz, Charles Weiler, Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen (par M. André Bauler), MM. Luc Emering, Fernand Etgen, Patrick Goldschmidt, Gusti Graas, Mmes Carole Hartmann, Mandy Minella, Lydie Polfer (par M. Gusti Graas) et M. Gérard Schockmel (par Mme Barbara Agostino) ;

MM. Jeff Engelen, Dan Hardy (par Mme Alexandra Schoos), Fred Keup, Mme Alexandra Schoos et M. Tom Weidig ;

Mme Djuna Bernard, M. Meris Sehovic (par Mme Djuna Bernard), Mmes Sam Tanson et Joëlle Welfring ;

MM. Sven Clement (par M. Marc Goergen) et Marc Goergen ;

MM. Marc Baum et David Wagner.

Se sont abstenus : M. Dan Biancalana, Mmes Taina Bofferdin, Liz Braz, Francine Closener, M. Yves Cruchten, Mme Claire Delcourt, MM. Mars Di Bartolomeo (par M. Yves Cruchten), Georges Engel, Franz Fayot, Claude Haagen (par Mme Claire Delcourt), Mme Paulette Lenert et M. Ben Polidori.

Freet d'Chamber d'Dispens vum zweete Vote constitutionnel?

(Assentiment)

Dann ass dat esou decidéiert.

Domat si mer dann och um Enn vun eiser Sëtzung vun haut ukomm. Déi nächst Sëtzunge si fir den 13., 14. a 15. Mee virgesinn.

D'Sëtzung ass opgehewen.

(La séance publique est levée à 15.28 heures.)